

續修四庫全書

卷之四

卷之四

卷之四

卷之四

卷之四

卷之四

《續修四庫全書》編纂委員會編

續修四庫全書

上海古籍出版社

一四〇七・集部・別集類

西堂文集二十四卷 西堂詩集三十二卷 西堂樂府七卷（詩集于京集卷一至

樂府鈞天樂下本）

〔清〕尤 侗撰

溉堂詩集二十一卷（前集九卷後集六卷續集六卷） 溉堂文集五卷 溉堂詩餘二卷

〔清〕孫枝蔚撰

序

尤子悔菴受史職五年奉假歸輯其詩集成命曰于京以屬序余讀之喟然而歎竊有感於風人之說也夫三百篇之取乎風也不以其時乎時當春夏入於陽和煦溫而被潤人習而安之迨夫秋冬拂崇岡振長條其爲聲也噫嘻以怒號而人之遇之者亦爲翫航而收聽凡天下之有聲者類不能無情此人所以相爲感而發之於詩也子夏之序詩曰發於情情非作詩之本乎詩必有所感而後以成聲聲之不因乎感者其詩爲無情無情則無本故詩之有正風有變風皆其時爲之非君

于京集序

子之得已也悔菴擅詩名者四十年當其少時遽舉屬以邁往之氣見之於詩藻采紛披一無絺章繪句之陋習迄於今往往信手疾書遂成篇什而渾脫瀏灑儼然與唐大小杜相上下其西堂雜組奔走海內先受知於

世祖章皇帝今復爲

皇上所簡擢而其子慧珠又官庶常父子先後同館職國家之恩遇所以酬其夙昔者亦至矣以是爲詩宜乎多歡愉少愁苦而悔菴不之然者何歟余怪焉又以爲得情之正耳五年中雖慧珠得貴顯而其骨肉摧殘忽

已踰半拊昔憑今瞿然影隻哀逝之餘而俯仰咨嗟又有不止於是者念少與天下賢豪橫襟獵獵互爲雄長今復尋衰白更遭多故徒以一身偃僂聲折勞勞於天壤之內而又何樂哉凡所爲詩羽調商音取次側出其亦有不能已者在也余與悔菴少相善同官以來珥筆追隨嘗以靜默爲規趨蕭閒爲慰藉故交好以加密嗟嗟悔菴固天下情至之人自命於千古者也而一時之竟枯得喪何足具論哉比者余與悔菴矢言旦旦自以

蒙

國厚恩無所報稱將共乞假滄江相與學道窮年以遂

于京集序

其初志而悔菴乃先余去余所以序其詩爲之三歎息而有餘愧也

康熙癸亥六月既望太倉年春弟黃與堅誤

據復旦大學圖書館藏清康熙刻本影印原書版框高一
七九毫米寬二七六毫米

西堂文集
西堂詩集
西堂樂府

〔清〕尤侗撰

于京集卷一

哀銘集另刻

長洲尤

何

劉一

自戊午六月至己未二月止共詩九十首

赴 召言懷四首

天子求賢下制書羣臣薦表滿公車自多冠帶填金馬
何意弓旌責草廬對策豈能追賈董上言曷敢比嚴徐
入山未遠長安近不許休官賦遂初
解組歸田二十年煙霞痼疾久高眠從無妖夢乘車蓋
偶有虛名掛簡編瓦礫誤收鐵網內漁樵重拜玉堦前
蕭蕭白髮登程去回首青山意惘然

于京集

卷一

十

武帝珠襦香不聞上林曾賞氣凌雲慚無犬馬酬今日
每望園陵憶 舊君當軸尚承南海 詔旁觀休誦北
山文此身已作煙波叟應召惟堪獻野芹
世祖幸南海子召徐狀元元文問側履歷

出門心事總茫茫襖被誰人與辦裝彭澤田園將廢棄
杜陵妻子獨悲涼孤舟偃仰方三伏千里攜持祇十行
社櫟終非廊廟用應憐衰野放還鄉

熱

生平嘲熱客何意及潛夫白鳥方司夜赤鳥正載塗聞
吟團扇曲思對北風圖可惜扁舟在無從汎五湖

舟阻京口

紅日燒空行路難長年悶坐只如閒袍船截住橫江口
便是南徐第一關

揚州寓寺立秋

纔到維揚已倦遊暫棲蕭寺此登樓黃河決水上田涸
赤日當天大火流南下王師方牧馬北征客子且停舟
驟聞秋至登然喜奈人離心變作愁

高郵同旣庭夜話

秦郵景物昔年殊浩淼難尋覺社湖蓮葉不歌持櫂女
柳條却走築堤夫風高尚詫蛟龍聞日落時聞雁鵝呼

于京集

卷一

二

幸有故人同夜話暫持斗酒慰羈孤

碧霞元君祠 在寶應稱睡公娘娘

泰山分祀向江東忽夢熊羆作睡公霧髻煙鬟趨婦女
瑤環瑜珥弄兒童金爐夜裊沉香火寶殿晨開船趁風
遙想靈旗遊幸處天妃咫尺有行宮

淮上

淮水湯湯憂若何上流日夜納黃河當年鐘鼓三洲少
此地汙泥數斗多牛喘田家聞叱歎鷄鳴關吏苦譏訶
桂枝未遂山中約惆悵王孫招隱歌

黃河二首

千里黃河一望中，開船喜借大王風。片帆忽過桃源驛，夾岸新成瓠子宮。祇爲漕儲需轉運，頻勞版築問司空。籌河買讓真無策，却憶吾鄉徐武功。

河源星宿出崑崙，九折南來日月吞。滾滾洪流歸六掃，芒芒禹跡在三門。地形險過黃牛峽，風利驚看白馬奔。縱使乘槎上天漢，何如濠濮樂蒙園。

病

自揣迂疎無宦情，未能免俗敢求名。微官久棄還初服，垂老翻勞賦遠行。千里風濤驚噩夢，百年霜露困浮生。朝來病骨支離甚，何用文園臥長卿。

于京集

卷一

五

故城夜泊

早起開新闢，黃昏宿故城。無邊秋草色，不斷夜濤聲。水國空三戶，天涯獨五更。明朝看青鏡，白雪滿頭生。

河上老翁歎

黃河灘頭獨家住，老翁零丁攜老嫗。兒無襦袴女無牀，糞土之牆蔽風雨。本因避水到此居，水來又走高墩去。遙指河濱千頃田，滔滔今已成大川。可憐廬舍遭漂沒，鷄犬隱約波濤間。河身橫溢數百里，但聞鬼哭無人煙。隄堰築成旋潰決，朝廷空費水衡錢。田糧雖免丁役，在柳條竹索相牽連。老翁家中無一物，每食不飽且安。

眠嗚呼老翁勿歎息，明朝我亦愁行船。

舟行絕句三首

黃河水沒萬家田，田裏田田出白蓮。千顆蓮蓬百丈藕，採來喜不納官錢。

揚州划子掛蒲帆，棹入荷花百尺潭。潭上垂楊千萬樹，斷腸風景似江南。

錦鱗潑潑滿漕渠，惆悵難傳尺素書。江東不少鱸魚賣，却向黃河買鯉魚。

濟上七夕二首

離家一月初弦未，及天孫隔一年烏鵲橋邊水。幾許

于京集

卷一

四

今宵我亦聞河邊

迢迢銀漢露華生，夢繞江南千里程。夜半歸來河畔草，秋風兩岸怨蛩聲。

南旺分水

永樂九年潘叔正築壩東平州戴村遏汶水無東流至南旺而中分

此處運河脊平分，汶水中央排奪禹蹟。蟲鼠顯神功地，割魚龍宅天旋牛馬風。南船人喜劇一往，看飛蓬。

寄家信四首

出門殊惘惘，婦病已經時。藥餌難將息，錢糧費主持。竟成垂老別，不盡遠相思。千里綿綿道，如何寫一辭。家貧亦何有，生性奈多愁。門戶艱難盡，晨昏勉求年。

蟋蟀

光催蟋蟀世態變蜉蝣我已先看破潺湲河水流

大兒隨我去小子獨承家未熟謀生計休空度歲華文

章應日上車馬且天涯汝發金陵道遙看北斗斜

娛老無佳味含飴喜弄孫已知親筆墨未解問寒溫送

別猶臨水歸來應候門康成書帶在好與小同論

臨清阻風

二十年前曾阻風清源漂泊此時同重來祇覺鬚眉白

獨坐翻嫌燈火紅秋氣漸深聞落葉鄉思轉劇訴鳴蟲

人生百事嘗相左水自西流風自東戊戌臨清阻風詩云水順即風逆盛

虛理亦然

千京集 卷一

五

德州同既庭坐月

今夜德州月故人欣共看知心時俗少行役暮年難白

露愁砧杵秋風憶釣竿漫誇西域獸萬里入長安

時西域有貢御船

滄州漫興二首

驛馬臨三戍征車歷九秋戊戌八月戊申九月昨非已

難問此去復何求世事涼風起浮名逝水流天涯勞極

目試上望京樓

野性航高臥隨時作遠遊吳山青草暮漢苑白雲秋天

未驚飛雁沙灘羨睡鷗平生浩蕩意喜說近滄洲

舟中一蟋蟀竟夜作秋聲能令征夫怨寧惟懶婦驚水

程隨萬里寒信急三更何似涼堦畔微吟玉露清

雨夜候既庭舟不至鄰舟有吹笛而歌者二首

風雨瀟瀟打布篷孤舟相失玉河中天南一望雲千里

嘹歷三更叫斷鴻

誰家吹笛按吳歌聽罷凄然喚奈何此夜青衫知更濕

流河驛畔雨聲多

上大司馬宛平王公

先皇昔臨白玉堂視草首數瑯琊王銀杏曉騎彩雲動

金蓮夜歸明月光日晏每饒蓬池鱸天寒特賜雕錦裘

學士少年號內相禁中頗牧兼班張爾時家尊大宗伯

一門鳳閣開青箱海內爭推大小許如仰北斗麗文昌

放勳徂落重華出疇咨岳牧賡明良老臣懸車日月下

公乃高步登巖廊浴陟尚書司喉舌進掌邦政平封疆

國家宴安啓萌孽蛾賊槃牙跳三方至尊宵衣戒司

馬穀乃甲冑峙糗糧公當大敵色不動折衝樽俎掃機

槍祇今小醜就剪滅馬上露布奏御牀天顏深喜武

功定投戈講藝求縹緗潤色鴻業資禮樂秩宗黼黻夔

宮商詔命諸臣各搜薦朕其試哉惟才良山公啓事

千京集 卷一

木

正絡繹金馬獻賦來相將僕也江湖散人耳奈何濫玷
公車章却憶少爲邊塞吏曾厠扶風弟子行泰公世講
望顏色邯鄲天人歎非常生平著書有雜組公攜一冊
呈 先皇 天子飄飄凌雲氣比之子虛與長楊顧問
及門重太息舉似高座加掄揚人生遭遇真有命九重
賞鑒空茫茫 先皇晏駕僕亦老灌園抱甕臥紫桑翹
首龍門悵延佇汙泥豈有雲霄望忽聞徵書下退谷驚
破泉石鉞膏肓捧檄咨且既不可賣山難辦案中裝十
年不上長安道顧視白髮增慚惶明公薦賢誠爲國恐
非桃李羞門牆願謁承明乞身去白衣山人放還鄉優
游太平歌雅頌待公坐論調陰陽僕也感恩知己何足
道於乎 先皇思不忘

于京集

卷一

七

賀孫愷似高麗使回秋捷

萬里邊關足馬行靛裝箭旅一書生親銜 天命馳周
道博採風謠到漢城白硯紙堅宜彩筆滿花席軟伴桃
笙歸來奏事金華殿笑換麻衣聽鹿鳴

送沈次雪令嘉善

薊門秋色起雙鳬仙吏輕舟進鶴湖衣錦家鄉無百里
下車風俗卽三吳絃歌子弟懷詩卷山水衙門入画圖
知爾政成還坐嘯好傳八咏到京都

同舉諸公公讌

芙蓉闕下集簪裾四海朋來慰索居烏有客方偕子墨
楊雄文或似相如解衣共醉新豐酒傾蓋相逢下澤車
寄語靈臺南太史德星可紀漢京書

挽葉元禮舍人三首

昔日曾登午夢堂一門珠樹盡琳瑯最憐文若年方少
何意僧彌命不長白玉塵談空謝客紫薇花影竟埋香
招魂誰送吳江去嘹唳征鴻唳數行

東華踏遍軟紅塵眼看秋風瘞壁人蝴蝶夢中燕市月
杜鵑聲裏曲江春刀鐔有約勞思婦劍缺無家泣老親

于京集

卷一

八

十載浮名成底用一棺道路已終身

漫說凌雲薦長卿哀江南殉庾蘭成

元禮曾注
哀江南賦

水萍踪

跡恒千里朝菌春秋便一生空贈紙錢懸墓樹祇留官
級寫銘旌修文天上尋常事莫倚才華傲玉京

挽侯記原二首

憶昔虞山會東風拂水時淒涼點鬼簿惆悵紀遊詩家

世三年血文章兩鬢絲五侯今已矣地下可連枝

予識
記原

在辛巳春虞山臨社坐中如黃韞生夏啓霖錢方明湯
卿謀章素文及侯德皆亡矣

膠水停舟日披襟向秬園芙蓉方滿澤明月正當門招
隱空埋骨遊仙不返竟燕臺遙酒淚祇共阿戎論

乙卯
六月

予過秬園記原少曾遇仙阿戎謂大年也

挽杜九高令子香武三首

香爲小字雪爲姿黃土生埋玉樹枝間說雙瞳剪秋水
教人憶殺杜唐兒

鍾情我輩得無同手把遺文泣阿翁桑樹金鏤好留在
冥中定放顧非能

孤鴻啼罷斷猿啼旅舍寒氷落日低纔寫挽歌先下淚
難言我自哭亡妻 予方悼亡

題王阮亭侍讀悼亡詩後三首

彈絕哀絃曲未終相憐相泣病相同吾家雖有閨房秀

千京集 卷一

九

那及王家林下風

燕山蜀道久驅馳回首紅橋飛柳絲一自寶釵敲斷後
更無人念衍波詞

相如今已賦凌雲侍女衣香鎮夜薰何似鸛裘貫酒日

春風髮影看文君

口號四首

四更鷄叫五更鐘正在沉酣渴睡中街上傳呼聲已遍
長安門外火城紅

丹墀紫閣極崔嵬駟馬高車亦壯哉却喜夢中都不見
閒遊仍到故園來

朝朝騎馬傍朱門夜夜張燈陪酒尊只此長安公事了
爲誰寒冷爲誰溫

數米量煤并買漿借人車馬賃人房點金辟穀俱無術
不信長安是首陽

龍石樓金陵納姬四首

從來名士悅傾城十四樓中賦定情愛抱瑤琴弄三峽
織綺娘子是前生

洞庭公子水晶宮新結同心十二峰朝看行雲暮行雨
始知神女會乘龍

舊夢揚州后土祠十年解珮訝來遲天風吹下瓊花種

千京集 卷一

十

開作人間連理枝 石樓感夢曾製瓊花夢樂府

郎上京華伴紫薇青溪桃葉依依金門早獻長楊賦
龍取天香罩画衣

萬柳堂二十八韻呈相國益都公

昔日廉希憲當今馮野王兩賢雖異世萬柳若同堂青

海家風盛黃扉相業光平章甲觀第小築午橋莊丘壑

藏公府山林近 帝鄉東華塵不到西苑鬱相望土厚

龍蛇伏天空鴻鵠翔翬泥因得水壘塊便成岡怪石支

幽洞繁花繞曲廊層臺叢古木側徑倚修篁細草眠麋

鹿高梧覽鳳凰最憐彭澤樹移出永豐坊初染鴉頭綠

深披鷺羽黃依依垂手舞裊裊折腰粧張緒風流遠王
恭容止芳將軍營幾列丞相宅周行堪矯平泉汰差強
獨樂荒陂池聊淡蕩風月自蒼茫休沐閒携杖招賢共
舉觴採蕘原不禁看竹亦何妨作達誠高致推恩卽道
場噢咻尋隘巷乳哺及空桑釣絕魚鰕餌籠餘鳥雀糧
生男應字賈街王定歸楊心寄煙霞外身依日月旁誦
詩瞻綠簑布政茱甘棠方獻南山壽宜承北斗漿今朝
占柳宿髣髴麗文昌

賜廩恭紀二十八韻

天子坐明堂羣工滿廟廊周官升俊秀漢室召賢良禁

于京集

卷一

七

鑒傳 綸詔公車奏薦章三河推賈誼四府舉辛湯符
檄徵空谷弓旌下曲鄉鳬鷺皆跳躍騏驎並騰驤敢附
夔龍侶聊隨鵠鷺行擔簦趨上苑簪筆待長楊臣志思
陳策 君恩問辦裝預憂旅斧之早念客衣涼 特賜
金三品兼支粟一囊朱提分九府白粲出千倉頓起蓬
蒿色頻充藜藿腸縹緗如潤澤燈火覺輝光寒可添薪
炭愁還買酒漿上書謹北闕索米笑東方鄰比從誇示
朝班願拜颺遙瞻 天駟遠正策玉鞭長翠輦巡郊數
黃裘冒雪霜 九重猶減膳萬戶亟輸糧宰相堂餐罷
將軍飛輓忙何緣開武庫遂爾濫文場小器同筐筥庸

材類批糠匪頒誠慶幸素食轉慚惶努力摘花管齊聲
頌柏梁碧霄常切近丹地共迴翔脂藥銀罌裏金錢錦
瑟旁昇平樂未艾燕衍永難忘

送宋牧仲權使贛州

帝京雲物觀陽回賦別登臨宋玉才征棹正隨寒雁去
放衙應及早梅開金娥昇處留粧閣木客吟成乞酒杯
身在江湖心魏闕青春還上鬱孤臺

呂真人印月軒詩二首

獨駕天風四海行鸞旌偶駐鄭州城高軒聳出西山爽
長劒飛來北斗橫年遠漫留延命訣夜深常聽步虛聲

于京集

卷一

三

嗟予尚帶邯鄲夢何日仙遊夢玉京

翹首神都八景輿仙人自昔好樓居赤松子採山中藥
黃石公傳圯上書三醉岳陽觀止矣再遊梁苑興何如
世人欲問朝元路一點冰輪照碧虛

春朝應右局教和羨門韻

絳節霓旌下紫壇真言疑贈碧霞丹側身天地多荊棘
矯首雲霄乏羽翰殘醉尚沾百末酒新春還薦五辛盤
羈人欲乞忘憂訣覓取心來與汝安

玉皇降辰應教和前韻

今皇郊祀肅壇壇臣輩欣逢恩詔丹五色雲霞開鳳殿

九天風雨駕龍翰遙問玉女搖仙佩願學金人捧露盤
從此旦明凜帝謂餘生豈敢再偷安

戊午除夕限韻四首

凡限韻者皆仙比所限韻與
美門訪謙同作後備此

今夕何年歲忽除光陰急似轉輪車祇應田舍閒扶杖
何事王門輕曳裾獨抱窮愁常默默相逢豪貴半居
不堪客路三千里腸斷哀鴻尺素書

時珍思奔喪南歸

歲已云除服未除顛毛蕭颯暮年餘靡家靡室因何故
爲圃爲農總不如黃土傷心空入夢青天搔首欲憑虛
風塵自恨回頭晚寡過猶然愧衛蓮

春風稍稍拂堦除可歎家無擔石儲意氣極天增潦倒

壬子集

卷十

五

文章慢世任軒渠幾年苦海浮沉我何處名山俎豆予
賓戲客嘲都謝却漫將問答混樵漁

齋心晏坐俗緣除思逐東風返草廬每望辰居依太極
偶從夜夢入方諸天邊不乏蓬山鳥地下難逢錦水魚
幸有故鄉知已在樽前暫遣旅懷舒

己未元旦限韻四首

瞳眴聞闔啓三元翹首東方初出轍十載歸田追粟里
一朝獻賦擬文園倚天每欲憑長劒行路寧當局短轆
買得彩絲空五色不知何處繡平原

班朝太史紀春元九陌三條車馬喧已見聲歌登雅頌

猶聞戰伐動乾坤青陽正命蒼龍駕丹地何勞白鶴軒
閱盡風塵徒膠擾不如谿谷植靈根

太平玉燭望昇元律管初吹寒谷暄風俗任從時世改
詩書獨見古人存壺中日月常憂短皮裏春秋亦覺繁
鸚鵡鸛鷄君莫賦逍遙我欲賦鵬鯤

凌晨齋祓默朝元呼吸靈風達九門萬象盡從青道出
衆星遙拱紫微尊人遊海上蓬萊宅家在江南楊柳村
但得扁舟垂釣去鑑湖一曲足君恩

上元卽事限韻四首

壬子集

卷十

五

青皇乍指斗杓東帝里春光此夕同花信欲催潑火
雨鳥聲先弄試燈風上元節慶留黃籙太乙祠開降紫
宮自有瓣香供靜課九遠莫問萬星紅

士女燈毬遍踏歌長安東去是渾河衰年賸有餘春在
羈客其如良夜何漫望長楊摘賦草遙瞻太液漾文波
朝聞天子親祈穀又看千門翠輦過

十二街頭画鼓鳴鬧蛾爭趁月華明金門未見魚龍舞
蕙帳空教猿鶴驚竹葉行杯憐舊雨梅花出戶喜新晴
浮沉孰似歸休是願借青山作主盟

寶燭三條經兩函迎神不比紫姑衫仙人自曳青藜杖
使者頻傳碧玉緘華屋競看鰲綵結故園空想燕泥銜

何當採藥尋真去長嘯同登大若巖

憶江南早梅限韻

春信江城報早梅南枝已發北枝催千林香影隨風散
一夜寒光帶雪開驛使相逢誰載酒羈人遠望獨登臺
高樓且莫吹長笛好待孤山處士回

旅夜聞春雁聲限韻

衡陽歸信在春先又逐東風向朔天錦字獨啣千里月
蘆花猶帶五湖煙頻催短漏青門畔似和哀笳紫塞邊
正是離人聽孤唳十三絃柱自婁然

皇太子大慶祭告頒赦二十韻

于京集

卷一

五

北極啓天闕東宮應少陽軒圖虹渚繞殷土燕祿將
初旭臨璇室前星出畫堂朝三稱世子儲貳體元良寶
冊垂高殿金衣錫御床鼎凝主器重蒙養聖功彰玉
葉初承寵瑤花遂發祥虞歌月復旦漢樂日重光甲觀
吹春琯椒闈獻壽觴思文昭下武太任媚周姜嬪御
同嘉慶疑丕喜拜屢貽謀本列祖降福自維皇清廟
崇牙羽郊壇薦秘香山川來擁護社稷祚靈長勞賜先
三事恩施及四方輜軒周海甸綸綍過江鄉解網空圍
土招弓問澗岡龍樓躋踴躍鳳闕想翱翔出閣詩書近
臨雍鐘鼓銷勲華一家在干載詠皇唐

典引皇哉唐哉

賦得宸章類河漢二十韻

仰觀雲漢倬天章追琢光華在我王祇識君心卽
太極應知帝座有文昌圖書河洛呈龍馬雅頌岐山
鳴鳳鳳曆哲本從元后宣嘉言共覩聖謨彰宮中
乙夜書千卷殿上宸綸詔十行萬乘贊龍真熠燿九霄
珠玉自琳瑯縹緗舊版充松棟絃管新聲起栢梁豐沛
歌風開兩漢昆池揮翰邁三唐琉璃硯匣供香案玳瑁
牙籤疊御牀每汎樓船謳太液時乘獵騎賦長楊迴
鑾南苑雕銀燭駐蹕西山背錦囊視草常聞題虎觀散
齋還見詠芝房臨摹金錯鈞飛白點染霞箋映硬黃墨

于京集

卷一

五

榜淋漓多賞賜彤輝踴躍並賡颺驚聞仙籟吹長樂疑
捧宮花出未央周誥商盤追渾噩吳歆楚奏聽低昂潮
東空笑貽三管織女猶慚報七襄五色景卿爭爛漫雙
九沐浴等輝煌寶鷄獻瑞棲秦時馴雉凝翬貢越裳奎
壁泰階誠有象璿璣鼎曆洵無疆

湖南凱歌四首

於鑠王師奮四征天威早見服蠻荆江山新變旌
旗色風雨爭馳金鼓聲青草湖邊萬馬渡黃陵廟口五
花營前徒士女壺漿滿願挽銀河洗甲兵
鳳闕朝聞露布傳將軍雨地下樓船雕弓已破瀟湘竹

羽扇還麾雲夢煙獵狁自當平六月鬼方何俟克三年
征夫不用歌楊柳爲駕檀車待勞還

幾載飛芻轉軸艦今朝鐵騎遂長驅二矛漸次除三孽
一矢何難殪獨夫夜雪方深猶入蔡東風驟發足吞吳

五溪已息南人反寫入明堂王會圖

天家重譯並來王蠻觸如何大夜郎螳臂豈能當斧鉞
旋頭先已掃欃槍三巴鳥道成京觀六詔盤江弔戰場
試聽錢歌朱鷺曲兩階干羽盡文章

花朝前一日曹正子招諸同人雅集二首

千京集

卷一

七

春色初分爛熳晴草堂裙屐漫將迎羈人欲折江南柳
好友如逢陌上鶯共喜面談留翰墨獨憐肺病斷杯鐺
憑君擊鼓催花發却恨花辰明日生

公子南皮正少年芙蓉車蓋集羣賢卽看勝事猶前日
何意佳人至各天四座雅堪登回障一差足代歌絃
高粱河畔多青草踏遍春風總惘然

月夜有懷

春月正闌干春風尚半寒江南芳草綠客夢滿長安露
下花香濕烏啼玉漏殘徘徊羅帳外應照淚痕乾

寒食登毘盧閣二首

獨上毘盧閣蒼然見 帝都東風作寒食百草滿平蕪

土雨春衫濕江鴻客淚孤低迷千里目惆悵白雲無

苦憶松陰下攜樽共故人婆娑忘歲月荏苒老風塵黃

土皆長夜青山又一春不堪騎馬地夢斷五湖濱王辰

日宋荔裳攜酒同施爾恭陸處實小飲松下今三子皆
已亡矣

爲梁司農挽吳夫人四首

天上還歸吳彩鸞薔薇一夢影珊珊繡襦甲帳今何在
畫閣春風起暮寒

梁家廡案幾年齊不見春山眉黛低暮雨瀟瀟人去後
落花寒食子規啼

陌上花開人不歸舊巢雙燕故飛飛湘君自挽夫人去

千京集

卷一

八

望斷黃陵苦竹稀 夫人姊先歸司農早亡

蕉林書屋錦衾孤玉雪嬌兒泣回圖莫授瑤琴彈別鶴

江南客老白頭烏

于京集卷二

長洲尤 詞誤

自己未三月至十月止共詩八十八首

三月朔日太和殿

御試 賜飯體仁閣下恭紀二律

聖主垂衣雅好文徵書早染 御爐熏九天龍鳳飛千
尺萬國鷄鸞集幾羣綵筆擬從前席獻劉羹先向大庖
分自憐風雨蓬茅下白首重瞻五色雲

玉輅朝來出紫宸親題寶墨十行新上林正聽鳴黃鳥
內殿同看對白麟春草卽今招隱士野苧自昔燕嘉賓

于京集 卷二

此身願得如龍馬躬負圖書獻 聖人

御試省耕詩二十韻

青鳥當司啓蒼龍乘載陽土膏開徑術木正迓勾芒元
日初祈穀先農已獻祥三推參保介五種出倉箱 聖
德追躬稼 深宮思省方 翠華巡綺陌 鳳蓋轉蘭
塘社鼓千村急茅綯百室忙鳴鳩拂其羽戴勝降于桑
廡廡周原茂畇畇禹甸長隴頭陳榘柘谷口下牛羊方
聽甌簾祝因歌芟梓章汎舟莒葉渚駐馬杏花莊田畷
幽吹樂 曾孫旨否嘗旌旗廻細草劒佩繞垂楊靈雨
隨車至和風夾路翔 賜和連嘶畝勞酒遍畿疆馴雉

依苗黍哀鴻飽稻梁盈寧歡婦子遊豫頌 君王豐歲
多高廩邦家有餘香佇看 鸞輅返共進萬年觴

十八日
萬壽節

憶故園新笋

故園松菊已蕭蕭池畔琅玕尚未凋春後籜龍長幾尺
雨中玉版蠹千條思攜纖手佳人滑笑脫斑衣稚子嬌
今日天寒無翠袖茶煙裊裊爲誰燒

望鄰院海棠

朔地春寒花不飛誰家錦樹獨菲菲粧成日出勻脂頰
睡起風前鬪舞衣似向東頭窺宋玉恰從半面認徐妃

于京集 卷二

當年曾受梅花聘腸斷江南音信稀

送旣庭南還

同載扁舟同旅羈不堪揮手在臨岐青山有夢眠常穩
白首無家歸獨遲客舍三年愁失伴 君門萬里悵何
之天涯兄弟分攜苦便似河梁泣別時

述懷四首

家在蘇臺東復東烏頭忽變白頭翁飄零書劒江山外
寂莫田園風雨中舊夢幾迷桃葉渡新愁還鎖柘梁宮
皇都此日花如錦爲囑東君休洗紅
捧敝盧龍是極邊挂冠久已賦歸田歌風每望昭陵地

讀曲猶思天寶年玉梳珠襦悲杳渺蘭臺石室苦流連
重騎瘦馬長安道獨對蒼茫總可憐

十年臥病掩柴荆藜杖蒿簪亦遣情一別刀頭隔兩地
幾尋石上話三生隨風紙帳遊魂亂如雪麻衣涕淚橫
遠望家山誰寄恨暮雲孤雁斷腸聲

獨坐惟堪問影形相逢遮莫笑清醒空房漸覺顛毛白
秃筆難教汗簡青仙佩偶然來紫府瓣香聊爾誦黃庭
不如早趁天風去看寫新宮壁上銘

四月十五日

聖駕禱雨立降喜成二律限韻

于京集

卷二

三

願覩昇平大有年井田況在 帝畿邊今朝靈雨零三
五他日嘉禾取十千膏澤應垂金掌露餘波還瀉水簾
泉若非閭闔蒼龍駕那得銀河下九天

深宮齋祓念蒼生莫遣南東呼癸庚早魃敢同石燕舞
雨師早馭土龍迎隴頭麥浪如雲散陌上花光照水明
佇聽薰風解愠曲 君王親奏五絃聲

和羨門韻三首

我意冷然寒壑水不堪客舍火雲蒸孤飛苦似離鄉鳥
獨宿真同退院僧六月漫騎官路馬五更又點早朝燈
何時解帶投林去一枕松風夢尚能

消磨白髮任光陰欲作燕歌變越吟孤客祇懸千里夢
一官難繫百年心蘭臺筆閣誰相問蕙帳香殘何處尋
翹首天邊金馬地可憐鳬鷺自浮沉

浪跡天涯興澗然空餘形影坐相憐無心更獻甘泉賦
有暇惟吟秋水篇大暑方驕行急雨西山欲暮起長煙
京華歲月知多少何似羲皇紀小年

送李子德檢討歸養二首

高臥荆山三十年竭來待 詔賦甘泉身依北闕 君
門下夢繞西京親舍邊抗疏遠辭形管侍歸田仍賜綵
衣旋間居頻向燕臺望閭闔雲深隔九天

于京集

卷二

四

都亭把酒送君歸渭水高堂志不違築圃正逢紅稻熟
扶筇常看白雲飛未酬 君命臣猶壯暫解朝班世已
稀千里蓴羹吳地遠自憐鄉思欲沾衣

立秋日雨窓限韻三首

金風一夜報新秋不住空簷宿雨流便覺炎涼俄頃換
漫勞形影自相憐故園苦隔關河邈華髮難消歲月悠
莫聽寒砧動歸思曉霜早已白烏頭

羈縻長安又一秋閉門原不異林丘沒堦積水知深淺
出岫閒雲任去留征雁浮沉書未到啼鶯斷續韻難酬
何時往問蓬萊渡我意飄然不繫舟